



Scolnan di enseñanza avansa a participa den proyecto di naturaleza

TurtugAruba a conscientisa un total di 50 klas



ORANJESTAD

Recientemente TurtugAruba a haci un proyecto di conscientisacion na tur 9 diferente skol di Mavo, na Colegio Arubano pariba di brug y Colegio Arubano Oranjestad, International School of Aruba y na Schakel College, 50 klas en total. Cada alumno di Ciclo Basico 2, un total di 1100 mucha, a haya un ehemplar di “The story behind the barricades”, un buki traha door di TurtugAruba y realisa cu sosten financiero di Cede Aruba.

E buki ta yen di potretnan y skirbi na Papiamentu y Hulandes. E tema ta e Driekiel (Leatherback Sea Turtle) na Eagle Beach.

E entrega di e bukinan a wordo combina cu un Powerpoint Presentation den



tur klas y oportunidad pa haci pregunta. Pakico eigenlijk tin baricadanan riba e beach?

Cada aña un grupo di Driekiel ta bin for di e awanan frio di parti Norte di Oceano Atlantico pa traha su neishi na Aruba. Turtuga di lama sa landa hopi leu.

E ultimo trinta aña su cantidad a baha formal mundialmente y segun World Conservation

Union (IUCN) nan ta wordo menasa cu extincion completo. Mester tuma medidanan pa proteha e luga na unda nan ta traha neishi y tambe na unda nan ta biba y come, incluyendo e rutan migratorio.

TurtugAruba ta e Fundacion local cu ta proteha e turtuganan marino cu ta bishita Aruba pa traha neishi. E boluntarionan

di TurtugAruba ta vigila Eagle Beach y nan ta zorg cu e turtuga mama por pone webo trankil. Mes ora e turtuga ta cla e boluntarionan ta proteha e neishi cu e baricadanan di DOW. Asina e webonan por desaroya sin wordo stroba.

E alumnonan a haya informacion tocante e biologia di e turtuga di lama i tambe tocante e peligernan cu ta menasa su existencia riba nos planeta. Desaroyo extensivo di e zona costal ta un di e peligernan grandi: si tur e beachnan ta wordo uza pa construi hotel of otro desaroyo turistico no keda luga pa ni un neishi di turtuga!

Otro peliger existente ta polucion. Imaginabo un saco di plastic cu ta drif den e lama: e Driekiel facilmente ta confundi esaki cu un jellyfish, su cuminda preferi. E por causa su morto. Un potret di un turtuga chikito cu ta pega den un cup benta afo riba e beach ta emociona e alumnonan ora nan ta compronde cu pesey e no a yega lama na tempo.

Nan tabata sumamente impresionado ora nan a wak con grandi un Driekiel ta. Nan casi no por kere cu un turtuga chikito embra lo bin bek pa pone webo despues di 20 aña na e beach na unda e mes a nace. Di con e turtuga sa?!!

Normalmente un neishi di Driekiel ta kibra despues di 60 – 70 dia di incubacion. E chikitonan (mas o menos 50) ta sali tur pareu y pura pura nan ta bay direccion di e lama. E bunita potretnan di e presentacion (y tambe den e buki) ta ilustra e proceso completo.

E alumnonan ta entusiasma: “ta parce National Geographic pero e ta na Eagle Beach”. A wonder of nature, made in Aruba! Kico nos tur hunto por haci pa preveni cu e turtuganan, cu a existi pa mas di 100 miyon aña caba riba nos planeta no ta bay perdi awor?

*Percura pa beachnan y lama keda limpi, no benta sushi afo, sino bay cas bek cune.

*Duna e turtuganan espacio, keda na un distancia respetabel

*No mishi cu e turtuga chikito, e tin cu cana su so

*No uza luz anochi riba un turtle nesting beach y no saca potret cu flash

*Laga sa tur actividad di turtuga inmediatamente y yama Turtle Hotline (24/7) : 5929393 TurtugAruba tin e intencion pa ripiti e proyecto y entrega e buki tambe na tur alumno di Ciclo Basico 2 di e aña escolar cu ta bin. Ademas a tuma contacto caba cu EPB pa extende e proyecto.